

Gvangjsih Minzcuz Bau

ganhhau: CN45-0036 B.2015 Nd.7 Ng.8 liggaueq ietfeih nienz ndwenngux ngeihsam

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3181期

Dwzbauj Yen Siujhagseng Doxdax Aeu Vahcuengh Byauhcuinj Yienj Cezmuz

德保县举办小学生标准壮语才艺表演赛

6 nyied 26、29 nem 30 hauh, aen hozdung “Dwzbauj Yen 2015 nienz siujhagseng doxdax aeu Vahcuengh byauhcuinj yienj cezmu” faenbied youq Lungzsangh Cin Cungsims Yau、Nazgyaz Yang Cungsims Yau、Duh’anh Yang Cungsims Yau gawjhengz, baez hozdung neix youz Dwzbauj Yen Sawcuengh Yozyau cawjbanh, Lungzsangh Cin Cungsims Yau、Nazgyaz Yang Cungsims Yau、Duh’anh Yang Cungsims Yau ciuqbanh; daengx yienh Cuengh Gun song saw vah saedniemh yozyau gungh miz

299 baux hagseng doxdax ciengqgo、yienjheiq、yienj siujbinj daengj.

Youq doxdax seizde, doengh-baux hagseng camgya doxdax de daenj ndangdaenj Bouxcuengh moq-semq youh lai yienh, gig miz cingsaenz, sing ngamj cingz noengz dwk yienj aen damq aen cezmu, daegsaek minzcuz noengznwd, yienj ndaej ndeiyawj, neix ndaej bouxyawj nem bingzveij haenhndei, gyoengqde cungj bekfwngz boebboeb.

Ginggvaq sam ngoenz youh haenq youh dawzbanj dwk doxdax, gungh bingz ok itdaengjciengj 6

boux, ngeihdaengjciengj 9 baux, samdaengjciengj 16 baux.

Baez doxdax neix dwg aen yienh neix baijok nem doxgyau gij cingzci nem gingniemh Cuengh Gun song saw vah sonhag, beizyangj hagseng maij hag Sawcuengh, gig ndei dwk coi hong Cuengh Gun song saw vah sonhag gyauryuz ndaej hwngfat, doiq ndaw yienh henhoh nem daihlig fatyienz vwnzva minzcuz maenhndei gig mizyungh. Ndaw doz dwg Duh’anh Yang Cungsims Yau siujhagseng yienj Heiqcuengh.

(Nungz Yimeiz/农玉梅)



Aen Hoih Daengx Guek Minzcuz Yijvwnz Gungh- coz Yenzdauj Duihcinvei Youq Baekging Hai

全国民族语文工作研讨推进会在北京召开

Bonjbauq siusik (dungh-sinyenz Moz Binh/莫滨) 6 nyied 25 hauh, aen hoih daengx guek minzcuz yijvwnz gunghcoz yenzdauj duihcinvei youq Baekging hai. Gih raeuz Swcigih Minzyijveij fucujyin Yangz Gijbyauh daiq 5 baux vunz camgya baez hoih neix. Baez hoih neix nyinhcaen gvancez gij cingsaenz gvendaengz Dangj Cibbet Gaiq Sanhcungh、Swcungh Cenzei nem Cunghyangh Minzcuz Gunghcoz Vei, yenzgiu gij lohnaemj nem banhfap youq seizdaih moq guh hong

vah saw minzcuz, anbaiz hong duenh baihlaeng. Mizgven buvej nem danhvei baux fucwz hong vah saw minzcuz、daengx guek gak swngj(gih) minzveij、minzyijveij baux guenj hong vah saw minzcuz nem baux mizgven daengj 80 lai vunz camgya.

Youq hai hoih seizde, Cunghgoz Minzcuz Yijvwnz Fanhyizgiz nem Hwzlunzgyangh daengj 12 aen swngj(swcigih) nem danhvei doxgyau gij gingniemh nem guhfap gven-daengz hong vah saw minzcuz, doenghboux daiyauj camgya le

yenzdauj. Yangz Gijbyauh daiyauj gih raeuz gangjavah, de gangj le 《Hopheux “Seiq Aen Cienzmienh” Canloz Anbaiz, Dajsuenq Ndei Youq Seizdaih Moq Guh Ndei Hong Vah Saw Minzcuz Gih Raeuz》, caemh-caiq gyau caizliu 《Gvancez Lozsiz Cunghyangh Minzcuz Gunghcoz Cingsaenz, Haenqrengz Guh Ndei Hongh Fanhoiz Book Gvangjsih Gij Gvangjbo Yingjsi Vah Saw Minzcuz》. Gih raeuz 5 baux faen haeuj 4 aen siujcuj camgya hagsib nem yenzdauj.

SIUSIK DINJ

简讯

● 6 nyied 29 hauh banhaemh, Dunghlanz Yen youq ndaw yienh vwnzva cungsims gvangjcamz gawj-banh vanjvei, angqcoux dangj raeuz laebbaenz 94 hopbi. Youq yienjok seizde, aen cezmu siujbinj Vahcuengh 《Bouxlwg Dahhoengz》 hawj vanjvei yienhciegz bienq ndaej cei hoengh, singriu、sing bekfwngz、sing hemqndei daengj mbouj dingz mbouj duenh.

(Veiz Swngyang Veiz Damingz)

● “Caet it” yaek daengz duenh de, Gunghcwnz Yauzcuz Swciyen Minzcuzgiz bang lingjdauj nem cihvej cwnzyenz bae Sihlingj Yangh Dwzliengz Yangh, yawj doenghboux daiyauj dangjyenz geq、dangjyenz gungzhoj 6 baux, soengq haeux、youz daengj doenghyienh hawj gyoengqde, hawj gyoengqde gamjdaengz dangj nem cwngfuj gvensim nem hohfuk.

(Gyangh Dauh)

● 6 nyied 28 hauh, Libuj Yen Sanhgoh Hezvei youq yienhsingz Cunghsanh Gunghyenz gawjbanh fwenvuengz doxdax. Ginggvaq 3 aen cung haenqrengz doxdax, doeksat bingz ok fwenvuengz 9 baux, linghvaih miz 12 baux canghfwen ndaej bingzguh Libuj Yen canghfwen maenhndei.

(Yangz Sinhceenz Siengj Yi)

● Laebdaeb geij ngoenz daeuj, youz Gvangjsih Bouxcuengh Swcigih Cuzmuz Suijcanj Souyihgiz guhdaeuz cujeiz, Gvangjsih Hungzgvangh Nungzmuz、Fufung Nungzmuz daengj lai aen giyez simgyaez soengq 20 fanh duz bitgaeq lwg gungh dij 50 lai fanh maenz de hawj Sanhgyangh Duncuz Swciyen, caemhcaiq gibseiz fat daengz ndaw yienh Liengzgouj、Duzdung、Bazgyangh daengj yanghcin doenghboux vunzmbanj gungzhoj. Neix dwg doenggvaq doiqcinj fuzbinz bangcoengh vunz Duncuz baenzfouq.

(Gungh Bujangh)

● Daj 4 nyied ndawnyieb daeuj, Denzyangz Yen Yifung Cin Luzvei、Bahmiu、Sangcin、Cangz-gauh、Nwngzdai daengj cunh doenghgij ranz ndaem mak faenfaen dawz makdauzyouz bae haw gai, ndaej gyalai souhaeuj. Ndawde Nazgungh、Bohdungh daengj mbanj doenghgij ranz ndaem makdauzyouz lai de bineix gai makdauz souhaeuj mauhgyaq 10000 maenz.

(Vangz Gozsun)